



Վրբանես Փափագյան

Երկրի ձայնը

1

Արևը սաստիկ կիզիչ էր, մանավանդ նավահանգստի վրա, ուր նրա տաքությունը պատերի մեջ սթերված՝ անդրադառնում այրում էր վրայի աշխատավորներին:

Նրանք կրում էին: Սև քրտինքը աղբյուրի պես ծորում էր սևացած դեմքերի վրայից: Վագոնի մեջ մտած Մկոն ու Ակոն կարճ բահերով վերցնում էին մարգանեցի կույտից, լցնում կողովների մեջ, դրսի կողմից մի առ մի առաջ էին գալիս ուրիշները, շալակում կողովները, ու տախտակյա կամուրջից շոգենավ վազելով, դատարկում էին այնտեղ:

Այդ բոլորը կատարվում էր սև, թանձր փոշու մի ամպի մեջ: Կուլ էին տալիս նոքա ածխային փոշի: Ունանք տապից կիսովին մերկացել, մերկ մասն էլ լավ սևացած, ուրիշները մուր թքելով... աշխատում էին, արագ աշխատում...

Քսան հոգի էին. մի թուրք կապալառուի մշակները: Բոլորն էլ թուրքահայեր: Թողած տունուտեղ, կին ու որդի, վաղուց էր, որ նրանք այնտեղ էին և մարգանեցի փոշի էին կուլ տալիս:

Մկոն էլ նրանց հետ էր, իր հորեղբորորդի Ակոյի հետ: Մեծ շոգենավը կաթսան վառել, շոգի էր ճնշում. բեռնվել էր. մի ժամ ևս և մտադիր էր դուրս գնալ դեպի ծովը: Պատյանը սարստում էր շոգու ճնշումից, իսկ լայն ծխնելույզը թանձր ծուխ էր ժայթքում: Նավի կամուրջի վրա կանգնել էր անգլիացի գեր նավապետը, ծխամորճը բերնի անկյունին, հափրացած աչքերով դիտում էր մշակների

աշխատանքը և հազիվ, ուրեմն, շարժում էր գործում՝ տեսնելու համար, թե շա՞տ էր մնում ամբարի լցվելուն:

Նավահանգստի ներսում ջրերը խաղաղ էին. քարե նավամատույցի վրա կենդանություն կար: Դեմ առ դեմ, ավագոտ ափին ձկնորսները վահանաձկեր էին փռել արևի դեմ, իսկ նոցա գլխի վրա թռչունները խուլ ճիչեր արձակելով՝ իջնում-բարձրանում էին:

Թուրքահայերն աշխատում էին. պարբերական արագ և միակերպ աշխատություն: Չէին խոսում: Հազիվ երբեմն լսվում էր ընդհատ բառեր, կարճ, կտրուկ հրամաններ, որոնք ուղղվում էին մշակներին՝ քիչ հեռու կանգնած վերակացուի կողմից:

Այդ բոլորը կատարվում էր պատի այն մասում, ուր երկաթուղու գիծը հասնելով, շոգենավի համար վագոններով մարզանեց էր բերել կանգնեցրել: Պատի վերևի մասը դատարկ էր:

Երբ բավական կրել էին, Ակոն կանգ առավ և դառնալով հորեղբորորդուն ասաց.

Կարծեմ կեսօրը մոտ է:

Հա՞ արեց միայն Մկոն և գործը շարունակեց:

Շոգենավից քիչ հեռու խարսխել էր հունական մի առագաստանավ. նրա մեջ նավապետի ընտանիքը այժմ բազմել էր հովանոցի տակ և ճաշում էր. կերակուրի հոտը բուրում-հասնում էր մինչև աշխատավորները: Իսկ մարզանեցի սև փոշին հոսում էր դեպի մշակների բերանը, քթածակերը: Երբեմն թքում էին, սևացած թևերով սև ճակատի սև քրտինքը սրբում, որ ծորում էր մինչև մարմնի խորքերը:

Պարտքիցդ շա՞տ է մնացել, հարցնում էր այդ միջոցին Ակոն Մկոյին, կամենալով մի բան խոսել:

Ակոն տրամադիր չէր, բայց ցուցամատը աղեղնաձև ծալեց և նորանով աջից ձախ ցած հոսեցրեց քրտինքը, և երբ ճակատը քիչ սպիտակի էր, ասաց.

Դեռ կա... քսան մանեթ էլ կա:

Ակոն լոեց և բահը մղեց մարգանեցի մեջ:

Խեղճ Մկո. մինչև երբ պիտի կարողանար այդ գումարը վճարել: Չէ՞ որ քսան ռուբլի վճարելու ընթացքում նրան ապրել էր պետք, տուն փող ուղարկել...

Ուրեմն էլի պարտք պիտի աներ, էլի պիտի հաշիվներ ունենար: Խեղճ Մկո:

Այդ մտածելով, Ակոն նայեց Մկոյի սև դեմքին:

Կուգես իմ օրականից քիչ վերցրու, խոսեց նա պահ մի հետո:

Դու քի՞չ պետք ունես, մոռաց Ակոն, Սրապիոն աղայի անհատնում պարտքդ մոռացե՞լ ես:

Եվ երկուսն էլ միաժամանակ բահերը խրեցին մարգանեցի կույտի մեջ:

Այդ միջոցին հեռվում կանգնած մի շոգենավի վրայից լսվեց նախ զանգակի և իսկույն հետո սուլումի ձայն:

Կեսո՛ր, գոչեց մեկը ցածից:

Կեսօր... ասացին միմյանց ետևից ամենքը և տեղնուտեղը ցած գցեցին կողովները:

Հոգնել էին, սաստիկ հոգնել: Ցած դրին կողովները և նրանց կողքին էլ նստան:

Հաց ուտենք, ասաց Ակոն:

Անոթի չեմ, առարկեց Մկոն, բայց գնանք, նավամատույցն վերին ծայրը ելնենք, սիրում եմ ծովին նայել, դիտել հեռու, շատ սիրուն է տեսարանը, ծայր չունի...

Աչքերը տրորեց, թևով մի այտը սրբեց ու դուրս թռավ վագոնից՝ վերի պատի վրա: Ակոն հետևեց նրան: Ամեն կողմ, իրենց կողովների մոտ նստոտել էին և հանգստանում սև թշվառները: Մեկը ընկողմանած մարգանեցի կույտի վրա, մյուսը՝ մեջքի վրա փոված այրող արևի մեջ տաք քարերի վրա, մի ուրիշը թիկն

տված վագոնին... Ջուր չկար լվացվելու. ծովը խոր էր, ջուրն էլ աղի: Ստիպված էին սև մնալ ու իրենց մի կտոր ցամաք հացը սև ակռաներով խածնել ու փռնու հետ կուլ տալ:

Վագոնի մի անկյունից Ակոն հանեց թաշկինակով կապած հացը, երկու եղբորորդիները հեռացան դեպի նավամատույցի ծայրը, հով տեղ չկար. արևի տակ, կիզիչ քարերի վրա նստեցին և պահ մի լուռ՝ սկսեցին ուտել:

2

Ալիքները գալիս ումբի պես պայթում էին՝ խփվելով կարծր պատին: Հեռվում մի քանի փոքրիկ առագաստանավեր բուռն կերպով օրորվում էին և կայմի ծայրով ջուրը համբուրում: Ալիքներից կազմվող փրփրային գծերը միմյանց հրում, միմյանց վրա ելնում, փոքրերին կլանում, մեծից կլանվում, ի մի էին ձուլվում և գալիս ծեծում էին ամբարտակը:

Այդ մոնչյունի միջոցներում լսվում էին ծիծառների ձայներ և շոգենավի ճնշված շոգու նուրբ սուլումը:

– Ցած չի գնում,– ասաց Մկոն կուլ տալով հացի մի կտոր. բողազս անապատի պես չոր է:

Փռշին է արել. իմն էլ այդպես է. կուզե՞ս, ջուր բերեմ:

– Ո՛չ, նստիր, ջուրը շատ տաք է:

Եվ շարունակեցին ուտել:

Որքան շքեղ է ծովը, խոսեց դարձյալ Մկոն քիչ հետո՝ աչքը ծավի հորիզոնին ուղղած:

– Այո՛... բայց ալեկոծություն կա:

– Այդ ոչինչ. շոգենավը դրանից չի վախենա:

Ակոն քիչ լոնց, հետո խորունկ շեշտով ասաց.

– Ի՞նչ լավ կլիներ, եթե մեզ էլ տաներ շոգենավը:

Մկոն ծիծաղեց:

– Ու՞ր տաներ, ասաց նա.– Եվրոպա՞, Պոլի՞ս

– Տրապիզոնի մոտից է անցնելու:

– Կանգ չի առնի այնտեղ:

– Կկանգնի, առավոտյան ես դեկավարին հարցրի. թուրքերեն գիտեր:

– Է, ինչո՞ւ հարցրիր, միտքդ ի՞նչ էր:

– Հենց այնպես, ժպտաց Ակոն,– ուրախացա: Որ Տրապիզոն կանգ է առնելու:

Մկոն կտրեց մի շերտ հաց, հետո տխրությամբ և մեղմ ասաց.

– Երեխա ես, Ակո:

– Ի՞նչ անեմ... Չէ՞ որ Տրապիզոնից են երկիր գնում: Երկրի ձայնը խոսեց իմ մեջ... Ի՞նչ լավ կլիներ, եթե այդ շոգենավը մեզ վերցնեք, իր ամբարների մեջ կոխեր, այդ մարգանեցի հետ թեկուզ ներս լցներ, միայն երկիր տաներ մեզ...

– Լավ կլիներ, այո... շատ լավ... Բայց պարտքե՞րը... Բացի դրանից, երթայինք երկիր, ի՞նչ անեինք...

– Է՛հ, ասաց հուզմամբ Ակոն,– աստված է վկա, որ այստեղ ավելի վատ ենք ապրում... Որ մեզ նեղացնող չլինի այնտեղ, որ հարկերը պարտքերը չլինեն, մեր երկրի բանջարեղենը միայն կկերակրի մեզ ողջ տարին...

Այո, բայց հարկերն էլ կան, պարտքերն էլ և ապա՝ կոտորած, արյուն, թալան...

Լոնցին գլխիկոր երկուսն էլ:

Ցածրում մյուսները ճաշել էին և պարզվել վագոնների հովանու տակ: Ամեն ինչ համարյա լոել էր: Մկոն սրբեց բերանն ու ելավ:

Ժողովի՛ր հացը, ուզում եմ քիչ քնել, ջարդված եմ:

Ասաց ու պարզվեց պատի վրա: Լայն պատ էր, մեջքը դարձրեց արևին, երեսը՝ ծովին:

Ակոն հացը հավաքեց, քիչ հեռու գնաց և նույնպես պարզվեց գետնին:

Լավում էին միմիայն ծովի շշուկը, շոգենավի դողալը և հեռուն, անտառոտ լեռներից ու ձորերից, ճահիճների մեջ կոկրացող գորտերի ձայներից կազմված խուլ աղմուկների համերգը, որ գալիս շնչալով ընկղմվում էր ծովի շշուկի մեջ: Բնության մրմունջն էր. անորոշ, բայց օդը լցնող մրմունջ:

Մկոն ծովն էր դիտում: Աչքը կապուտակ անհունության, մտքով գնում էր ավելի հեռու, անցնում էր ծովի հորիզոնը և դեռ ավելի հեռու, շա՛տ հեռու...

Եվ նա տեսնում էր:

Տեսնում էր այնտեղ, ծովի, սարերի և ձորերի ետևում, շա՛տ, շա՛տ հեռու, մի սքանչելի դաշտի վրա իր գյուղը, որի հորիզոնն էր Տավրոսի լեռը, շրջապատն էր՝ Մշո ծաղկավետ ու գեղածիծաղ դաշտը իր անոշ գեփյուռով, ճլվլան թռչուններով, պարզ, ականակիտ վտակներով: Սողոսկում էին այնտեղ գղզղուն ջրեր ամեն կողմից, փայլում արծաթի պես, շողշողում արևի տակ, միմյանց գալարվում օձերի նման, համբուրում, զգվում գինեբուկների և շուշանների, կյանք տալիս բազմազան բանջարեղենների: Մխտորուկն ու սպիտակ-բանջար, եղինջն ու մանդակ, բողիկն ու ավելուկ, կովու-ճակտեկն ու սիբեխ՝ բուսած էին շուշանի, կակաչի ու մեղրածծուկի, մեռնածաղկի և գետնի վարդի անուշահոտության մեջ...

Եվ ծածանվոմ, օրորվում էր, կանաչ արտերի ամբողջ տարածությունը, քամին սուրումկռացնում էր նրանց պարարտ-գլուխները... Մարգագետնի, մարդահասակ խոտերի մեջ արածում էին պարարտ կովեր, դմակալից ոչխարներ, թռչկոտում էին կայտառ այծեր, միմյանց գլուխ բռնում ուլեր և

գառնուկներ... Հովիվն իր թաղիքի հետ փովել էր խոտերի մեջ, հոտը շներին պահ տվել, ինքը գլուխը անուշահոտ ծաղիկների վրա դրել քթածակերը օդի բուրմանը տվել, գեփյուռից հովհարած՝ քնել էր, բարձրահասակ խոտերի հովանու մեջ...

Այնտեղ էլ կեսօր էր, արևը տաք: Հոտաղները վերադառնում էին:

Մանուկները ոտաբոբիկ վազվզում են աղբյուրիցը տուն, կանայք գույնզգույն հագուստներով տներից ել ու մուտ են անում. խրճիթների երդիկներից անոսր, համարյա աննշմարելի ծուխ է բարձրանում, կերակուրների հոտը սփռվել էր ամեն կողմ...

Պարտեզի մի ծառի տակ ահա Մարիամը փռել է սփռոցը կանաչ խոտերի վրա, անուշահոտ ծաղիկների կողքին, վճիտ առվակը հոսում-անցնում է նրանց մոտից, եգերքների շուշանն ու նարգիզը օրորվում են փոքրիկ քամուց, որ շարժում է նաև ծառի ճյուղերը և նստողների գլխին սփռում ծաղիկների վերջին թերթերունքները:

Ամառնամուտ է, Մշո սքանչելի, դրախտային ամառնամուտը: Որպես՝ս երգում են արտույտն ու դեղձանիկը, սարեկն ու ծիծառը, ինչպես օդը լի է անբավ ծաղիկներից գոյացած անուշահոտությամբ: Հոտ է արտադրում խոտ ու ծառ, նույնիսկ ջուրն ու հողը, ամեն ինչ բուրում է, անուշ բուրում...

Եվ այդ բուրրի մեջ նստել է նա մեջքը ծառին տված: Գաբոն ու Ռ-կոն՝ որդիները, ցեխոտ ձեռքերով ու երեսներով, հողաթաթախ ոտներով ու մազերով, բայց ուրախ գվարթ ճիչերով, մոտ են վազում, հայրիկի մորուքի հետ խաղում, ծնկների վրա նստում: Գաբոն իր ցեխից շինած տունն է ուզում ցույց տալ հայրիկին, Ռ-կոն ուզում է իր փոքրիկ մարզի մասին խոսել... Իսկ Մարիամը՝ իր կինը, առողջ կարմիր թշերով, անկեղծ ժպիտը դեմքին՝ մոտ ենում է նրան, համբուրում է, դնում է նրա առաջ տախտակյա մեծ կուշի մեջ լցրած թանապուրը, երեսին նարգիզի և կապույտ ծաղիկի թերթերունքներով խառն անուշ սոխառածը փռած... Վանա ձուկը իր անուշ հոտով լայնացնում է նրա ոնգունքը, սոխ ու գինձ, սամիթ ու կոտեն, բոդկ ու նանա՝ դիզացած են սփռոցի վրա՝ մի մեծ կտոր բանջարով պանիրի կողքին:

Եվ նա կտրում է հացը, երեսը խաչակնքում, ուտում է թանապուրից, ճաշակում ձկնից, ձեռքի ակովը աովակից ջուր է վերցնում, պապական կոկորդը թրջում...

Որպիսի՜ անուշահամ ջուր. օ՛հ, որքան քաղցր է նա: Եվ խմում է անհագությամբ: Ծարավ է, շա՛տ ծարավ...

...Ջարթնեց ու բարձրացավ: Սև ձեռքով քնաթաթախ՝ սրբեց ճակատը, անորոշ հայացքով ծովի անհունությանը նայեց, ապա պառկեց նորից ու փակեց աչքերը: Նորից երկրում է, նորից իր գյուղում, պարտեզի մեջ, կնոջ, որդիների մեջտեղ:

...Հանկարծ աղմուկը ընկնում է գյուղը: Ցած է ձգում գդալը: Մարիամը գունատ՝ վեր է թռչում, երեխայքը կպչում են մորը: Ի՞նչ կա, ի՞նչ է եղել:

Ոչինչ. հարկահանն էր, գյուղ էր մտել, տուրք էր ժողովում և մտրակներով, սվիններով ժողովում...

Է՛հ, այնուհետև էլ ի՞նչ կյանք, էլ ի՞նչ նշանակություն ունի այդ սիրուն երկրի տեսքը, կլկլացող աովակները. էլ ինչո՞ւ այդքան սքանչելի, անուշաբույր ծաղիկներ, էլ ինչո՞ւ գով քամին, պարարտ արտեր, գեր տավար... էլ ինչո՞ւ կին, որդիք... Չէ՛ որ այդ բոլորը վերցնում, ապականում, կոխտտում, պղծում, քանդում են հարկահանները, վաշխառուները, քրդերը, աղաները...

Էլ ինչո՞ւ այդ բնությունը, երբ նրա վայելողները իրենք չեն, այլ այնպիսիները, որոնք ո՛չ աշխատում են, ո՛չ գործում, ո՛չ նրա հարգը դիտեն և գալիս հափշտակում են, պղծում ու ավերում...

Էլ ինչո՞ւ պարտեզ մշակել, երբ նրա արդյունքը հարկահանի կոկորդն է անցնում. ինչո՞ւ արտ ցանել, երբ նրա ցորենը շահնայի գրպանն է ուռեցնում, ինչո՞ւ մարգագետինը խնամել, երբ նրա խոտը տուրքի է գնում, իսկ կովն ու տավարը քրդի խնջույքին ծառայում: Ինչու ուրեմն տունուտեղ շինել, երբ նրանք մի խումբ կանոնավոր կամ անկանոն հաճույքները լուսավորելու համար այրվելու էին: ինչո՞ւ, մի խոսքով, աշխատել ու տքնել, երբ ոչ աշխատանքիցդ մասն ունիս և ոչ էլ քրտինքիդ տերն ես... Ինչո՞ւ ուրեմն աշխատել, ինչո՞ւ...

Էլ ի՞նչն է կապում իրեն այդ բնության, այդ երկրի հետ: Հո՞ղը, չէ որ չեն թողնում նրան առանց պղծելու. օջա՞խը, չէ՞ որ բոլորի կրակը մարեցին՝ տավա՞րը, չէ՞ որ նրա կաթն էր իր բերանը մտնում և ոչ էլ կարողանում էր խնամքների փոխարենը ստանալ. եկեղեցի՞ն. մնա՞ց մի եկեղեցի, որ չքանդվեր: Ի՞նչը ուրեմն, կի՞նը, որդի՞քը... Ի՞նչպես իմանար, որ մինչև այժմ իր կնոջը չեն բռնաբարել, չեն առևանգել և որդոց գլուխները ջախջախել՝ քարերի խփելով...

Ի՞նչն էր կապում նրան ուրեմն այդ երկրի հետ... Ինքն էլ չգիտեր: Մի բան քաշում էր նրան այնտեղ, թեկուզ ոչ մի սեփականություն չունենար, թեկուզ իր գլխին կանգնած՝ խփեին ու ձեռքիցն առնեին իր յուրաքանչյուր բոլակի վաստակը...

Բայց նա կուգեր իր հայրենի երկրի մեջ գտնվել, իր դաշտի ջուրը խմել, իր պարտեզի ծաղիկները հոտոտել, իր լեռների խոտերով կերակրվել, իր կնոջ ու որդիների հետ տանջվել... Մի ձայն, մի խոր, հոգու լարերը հնչեցնող, աղիքները գալարող, սիրտը արյունոտող ձայն կանչում էր նրան: Երկիրը կանչում էր. երկրի ձայնը անընդհատ հնչում էր ականջին, ծովը, քամին, ծառը, բույսը, նույնիսկ սև փոշին բերում էր այդ ձայնը, մղում նրա հոգու ջղերի մեջ...

Այո, գնալ, գնալ այնտեղ, գնալ իր հողի վրա տանջվել, իր երկրի մեջ շնչել, այնտեղ մեռնել, միայն այնտեղ...

Վեր կացավ նորից: Քնել չէր հաջողվում նրան, քրտինքը ծորում էր, ծորում, և նա, աչքը ծովին, աղիքներն էր դիտում, ականջը ձայնին պարզում, երկրի քաղցր գրավող, կոշող ձայնին...

Տանջվե՞լ... Այո, իհարկե, այնտեղ տանջանք կա: Բայց մի թե այստեղ սակավ էր տանջվում: Սև փոշու մեջ կրում է, կրում. կեսորին տաք արևի տակ մի կտոր ցամաք հաց ուժով մղում-անց է կացնում չորացած կոկորդը, երեկոյան մի աման կեղտոտ ու անհամ կերակուր ուտում սև և մութ սրճատանը, մենակ, տխուր՝ պառկում է հոտած օդի մեջ, հիվանդություն և ախտ շնչում...

Աշխատածը ի՞նչ է. մի քիչ փող. դրանով ոչ միայն վեց ամիս կրած հիվանդության ժամանակվա պարտքը պիտի վճարել, այլև ուղարկել երկիր՝

վաշխատուին մեղմացնելու, ընտանիքին հաց տալու...

Տանջվել, այո՛, կնոջ ու որդոց կարոտը քաշել... Ի՞նչ էր շահել այստեղ. չէ՞ որ երկու տարի շարունակ տանջվել էր, ուրիշների գրպանը լցրել, իսկ ինքը մաշվել էր, տքնել, ոչ կանոնավոր կերել և ոչ էլ խմել:

Ինչո՞ւ այս բոլորը, ինչո՞ւ դատապարտված լինել միշտ տանջվելու. մի՞թե, իրենց վիճակված է այդ. բայց ինչո՞ւ, ի՞նչ մեղք են գործել, որին գրկել, որի հացը կտրել, ո՞ւմ կողոպտել...

Ա՛հ, կողոպտե՛լ, գողանա՛լ... Չէ՞ որ միմիայն կողոպտող, գրկող և գողացողներն են, որ կարողանում են ապրել, հարստանալ, առանց տանջանքի կյանք վարել և իրենց պես հարյուրավոր թշվառների բանեցնել փոշիների մեջ...

Չլինե՛լ արդյոք այդպես. կողոպտել, գրկել, գոհերի ճիշը երկինք հասցնել, չարագործության պյունների վրա պալատներ կանգնեցնել:

Ո՞չ, ամեն մարդու բանը չէ այդ. դա մի առանձին արհեստ է, կաթի հետ ծծվող ու հոգու հետ ելնող արհեստ... Իսկ իրենք՝ նա և իր նմանները, դատապարտված են նրանց գոհը դառնալու, նրանց երջանկության հիմքը կազմելու...

Պատկեց նորից: Աչքերը փակվում էին. ա՛խ, եթե կարողանար մի րոպե քնել, մոռանալ բոլորը: Բայց արևը տաքացնում էր նրա գլուխը և քնելը անհնար դարձնում: Նեղվում էր, անախորժ քրտինքով ծածկվում... Թևը աղեղ շինեց, շարժեց անդամները, գլուխը թևերի մեջ առավ և էլի սկսեց մտածել:

...Ուրեմն, այնտեղ անհնար էր ապրել, այստեղ էլ... Էլի, երբեմն թվում է, որ այնտեղ լավ է: Գիտես, որ երբ այնինչը մոտ է գալիս, խփելու է. պատրաստվում ես՝ կամ մեջքդ ես դեմ անում կամ բռնոնցքդ... Իսկ այստեղ: Սողոսկում են քրտինքիդ մոտ և երբ կարծում ես, թե աշխատել ես մի բան, մեկ էլ տեսար՝ չկա, ոչինչ չմնաց... Եվ շատ ավելի տանջվում ես, քան այնտեղ... Էլ ինչու՞ ապրել ուրեմն. արդյոք Աստված նրանց ավելորդ չէ՞ր ստեղծել...

Հանկարծ ցատկեց, նստեց և կռացավ դեպի ջուրը: Անդունդը, երերուն անդունդը քաշում, կարծես կանչում էր նրան:

Բայց շուտով սթափվեց, մի մեծ ալիք բարձրացավ և ջրի բուռն հոսանքով լվաց նրա գլուխը:

Ինչե՛ր էի մտածում, ժպտաց նա. մի՞թե ուղում էի ինձ ջուրը ձգել: Ինչո՞ւ ձկներին կերակո՞ւր... Ի՞նչ ծիծաղելի ճակատագիր, որ կողմդ դառնաս, մեռած կամ կենդանի՝ կերակուր ես ուրիշների...

Ջուրը քիչ գովացրած լինելով նրա գլուխը, այս անգամ նա քիչ մնաց ննջեր, բայց էլի՛ միտքը գնաց երկրին, էլի՛ ալիքները հնչեցին և երկրի ձայնը ականջին հասցրին...

Հիշեց, որ երկրից վատ լուրեր էին գալիս, սոսկալի բաներ էին պատմում: Արդյոք ի՞նչ դրության մեջ էր այժմ իր գյուղը: Ամեն ինչ անշուշտ ավելի քան երբեք՝ տակնուվրա, ո՛չ մշակություն կլիներ, ո՛չ տավար մնացած, ո՛չ արտ, ո՛չ կայք... Խլում են, թալանում, այրում և սպանում... Կենդանի՞ է արդյոք Մարիամը և ո՞ր քրդի հարեմում, իսկ Ռ-կո՞ն, Գաբո՞ն, ո՞ր թփի տակ արդյոք իրենց վերջին շունչն են արձակում... Իսկ ծերունի մա՞յրը...

Եվ այդ բոլորի հետ, իրենք այս կողմը, տանջվում են, պակաս արյունոտ հաց չեն ուտում, պակաս չեն թալանվում, մեռնում...

Ուժգնությամբ ելավ նստեց և արյունոտ աչքերը պտտացրեց շրս կողմը:

Ինչո՞ւ ուրեմն, մտածեց նա ուժգնությամբ, ինչո՞ւ այս բոլորը չկրել գոնե այնտեղ, երկրում, յուրայինների մոտ... Ինչո՞ւ այնտեղ, նոցա հետ չտանջվել, ինչո՞ւ չգնալ իրենց հողի վրա տքնել, երկրի օդը շնչել և այնտեղ էլ մեռնել...